

覺園筆記

歡 迎 翻 印

● 覺園筆記

● 每冊定價一角

● 寄費外加

發行所
上海
道
德書局

地址
上海貝勒路
電話
八一七四一

自敘

作善降祥。作不善降殃。積善餘慶。積不善餘殃。吾儒之爲善。無所不語。善視善行。善一日有三善。三年天必降之福。凶人語惡。視惡行惡。一日有三惡。三年天必降之禍。太上之言也。爲不善乎顯明之中者。人得而誅之。爲不善乎幽闇之中者。鬼得而誅之。莊子之言也。種麻得麻。種豆得豆。自因自果。情理宜然。方今人心陷溺。風俗澆漓。排斥宗教。毀滅信仰。蔑棄仁義。薄視宗親。悖倫泯恥。蕩檢踰閑。皆由不信因果之故。於是以個人之別業。造成衆人之共業。水火刀兵。瘟疫饑饉。種種苦報。自因自果。其又奚尤。吾聞之欲回劫運。先正人心。周安士有言。人人信因果。大治之道也。人人不信因果。大亂之道也。端居多暇。舉平生見聞所及。筆錄之。以資勸戒。未始非離苦得樂之一助云。

中華民國二十二年昭陽協洽皋月朔

著者識

諸惡莫作
眾善奉行

吳興王憲書



凡例

一世間上智少而中下人多。生知安行者無所慕。而自爲善無所畏。而自不爲惡。若中下人士。則有所慕而後勉於爲善。有所畏而後不敢爲惡。古人云。爲中等人說因果。爲下等人言報應。此學知利行。困知勉行。所以近於道也。

一是編雖以因果報應爲主。而亦間及佛理。如念佛生西事。精言之。心淨卽土淨。粗言之。以念佛之因。得生西之果。推之四聖六凡。何一非因果哉。或猶淺視因果。以爲常談未之思也。

一因果報應。真實不虛。其見於經史百家。及法苑珠林。冥報記。冥祥記。太平廣記。果報聞見錄。及歷代名人筆記者。均非杜撰也。是編大半皆親見稔聞之事。偶有先輩之傳述。間接所采錄者。皆信而有徵。絕無模糊影響之談。

一是編爲勸懲計。故於時地姓名。一一詳記。然有桑梓關係。義當隱諱者。只稱曰某。閱者諒之。〔近人李圓淨纂集二十四史中因果案證。極爲詳審。名曰歷史感應統紀。上海佛學書局出版。不可不讀。〕

一時勸人以口
百世勸人以書

白如久書



覺園筆記

榮縣黃 覺書雲著

清嘉慶中。縣南張丹崖。典性果決而喜爲善。以少孤。故事兄如父。兄歿。事寡嫂。待兩姪。恩義周至。族姪某歿。撫其孤。鄰人李某歿。調其母。恤其子。精岐黃術。活人無算。有具金謝者。拒弗受。尤嗜學。恆早起爲子姪倡。族中子弟貧不能學者。助之膏火。生平尊師重道。迴越恆人。有足爲世風者。居沙隄【卽張家壩】時。豐於貲。謂子弟之不克成。以無明師故。明師之不肯就。以無隆禮故。先後延邑孝廉侯龍田。富順進士王甘庭。兩先生生於家塾。曲意體貼。吮摯有加。冬製裘。夏製紗。晝腆其殽。夜芳其酒。殘炙不再進。新蔬必先奉。日必以暇時與師談。談必以微言探師意。凡先生所嗜者。不惜費。不畏勞。期適其意而後止。嘗偶談及嘉陽墨魚美。公陰遣人往購歸。以奉師。不言其所以。師謂應試時。啖鮮者。味尤美。公又遣人往。慮道遠日暄不可生致。則以瓦缸貯水草。二人舁之歸。再進之。師異之。以詰公。公不言。師廉得其實。感且歎。益殷殷教其子。學大進。將應試。先入城覓佳寓。師若弟均以輿送其中。公偕往。晝餐晚臥。視惟謹。諸子從師學。無異於其家。故聯翩騰達而不染世俗汚。人見之。亦不知爲誰氏子也。公嘗以趁集至鳳皇洲。【卽汪家灘】值鄉人鞭一無賴子。捶楚備至。詢知其故。曰

偷無死理。奚爲過慘毒。不虞斃命耶。鄉人重公言。皆散去。竊者匍匐叩且謝。踰年。公率子姪赴秋闈。至資中龍泉驛。有偉丈夫至。情意殷懇。一似重有感者。謂同黨有蹤跡旅客。發篋盜金者。來言狀。疑爲公至。特覘之。果然。請璧返。公曰。予固未嘗失金也。其人笑曰。盍驗公篋。則朱提二百兩。已不翼而飛矣。乃大驚。其人出袖金示曰。此非公故物耶。請復之。公謝問故。曰。鳳皇洲之竄人也。遂引去。其他慷慨好義多類此。年八十卒。子五人。士鵬。青鵬。俱廩生。麗鵬。庠生。出繼子儒鵬。例貢生。軒鵬。舉人。湖北知縣。卓有政聲。孫十五人。懋修。時修。潛修。俱庠生。淑修。廩生。曾孫三十五人。莘莘然。濟濟然。一門之盛。由公啓之。吁。真人傑也哉。查邑乘行誼門。載公數大端。獨其尊師重道。則未之及。語云。師道立。則善人多。今師格日鑒。學風愈壞。故舉吾所聞於先師詹長坡先生者。又以質之其孫。亦云然。觀其視無形。聽無聲。先意承志。體貼入微。乃若此其忠且敬。所謂事師如事親者。非耶。人第見玉樹森森。聯英接萼。抑知培根柢。溉萌蘖。扶枝幹。以俟夫奇葩異果者。固非一朝一夕也。雖曰天佑善人。毋亦公之自爲因果歟。

按張公殺生以供師膳。殊可不必。特其至誠。非時人所及。故節取之。予幼隨先兄書年。遊詹長坡先生門。卽飫聆張海雲太先生行之醇。學之粹。政績之

美。長與其文孫墨卿交。益得聞都較。民七之夏。客榮錦祠。編纂張氏譜。因得知其詳。爰撮略記之。太先生諱軒鵬。號海雲。自幼凝重。與羣兒異。以舉人官湖北。歷署枝江。來鳳。恩施。松滋等縣。所至興利除弊。政通人和。三任巴東。巴東人作俚詞。使羣兒歌以迎之。如漢郭細侯故事。有巴東人真是福氣好。從前張太爺。今朝又來了。及其去也。又歌以送之曰。巴東人真是沒福氣。從前張太爺。今朝又要去。云云。紳學界別爲四言詩八章頌之。具詳本傳。當宰松滋時。生母卒於家。聞耗。或謂降服子。可毋報丁。公曰。如親恩何。竟解組歸。兄弟凡五人。當析產時。以承祧伯父弼故。應得三之一。公不可。請於父丹崖公。願均產五分之。公大喜。已而分配繁瑣。又讓腴而取瘠。瘠故。今子孫猶保之。生平寡言笑。礪行砥節。先後主講桂林旭川兩書院。以敦品勵學爲多。士倡。故遊其門者多端士。蔚爲學風。非公不入署。尤絕口不關說詞訟。嘗修縣志。於前人嘉言懿行。詳采備錄。謂揚善卽以風世也。今七十餘年矣。士夫猶津津稱道之。民十四。邑人協請於大府。附祀文廟鄉賢祠。供木主焉。子三人。孫十三人。遊庠食餼。置身軍政學界者。不乏人。故邑人言世家者。首推張氏云。

道咸間。威遠顏公厚菴。昌英。少時家赤貧。幾不能自存。與李某爲姻兄弟。窮亦相等。傭於鹽商某。勤謹異常。令司會計。主出納。益精審無或誤。遂重倚任之。旋以辛貲入。

股利漸豐。每經手事。無不贏厚利。乃獨營鹺業。咸同間。藍李之亂。井竈多荒。公竭力謀復之。所開鑿無不成功者。甚至他人集款將鑿井。但浼公爲定地點。一經指示。水多且鹹。且出火。故每提乾股爲報酬。歲入益豐。與李公相提攜。屹然爲商界領袖。大行布施。嬰兒嫠婦孤貧老病廢疾。皆自周之。著爲例。鄰封數百里。橋梁道路。公獨力建修者。不可勝數。隄爲三江鎮。爲榮威赴嘉之孔道。豁廣而無橋。每洪流暴漲。過涉者常有滅頂憂。豁側一老人。擬募建橋。未果。賁志以歿。次年春。有老人詣自流井求見公。謂遠來。須面言。不過數語。不敢絮絮瀆公聽也。公見之。令坐。堅辭。坐椅前小凳。通姓名訖。詢彼來意。曰。三江鎮以無橋故。歲常淹斃人。聞公好善。特懇命人往勸之。倘蒙建橋。感且不朽。語罷便去。留之不可。公遣人往視。果宜橋。立命人以貲往鳩工庀材。尅期經始。高廣堅固。已而落成。特請公往。官紳大集。僉感公義。問公何以知此地當建橋。公曰。尊處某來面求者。衆大驚異。謂其人去年已逝世。何由遠見公。公力言不虛。述其人言語狀貌。果豁畔人。以修橋爲志者。不意其死而不忘斯舉。竟現形求公。了其夙願。公曰。有功於民。則祀之禮也。況死猶有靈。克償厥志者耶。是宜爲橋頭土地神。以報之。僉曰善。予應試時。來往經此橋者屢矣。歲久無傾裂痕。土人猶嘖嘖頌公德焉。又榮之南汪家灘者。旭江正流也。每大雨後。兩豁山水驟漲。行者不得

渡。公聞之。使人來度地。將建橋。沿谿岸皆土壤。不得石底。無可置基礎者。公自來。宿鄉市中。擬明晨沿途履勘之。是夜不雨。谿水漲。冲刷泥沙。舊橋基朗然在目。衆以爲善心所感。水神効靈。因就其地建福星橋。今七十年矣。完好如故。其他善行。不可殫述。川南各縣。無不知顏善人者。公晚年好道。延眉山劉寶臣先生於呂仙岩。全家師事之。深造有得。有丈夫子五。長曉帆。治鹽業。錚錚有聲。曾樞元中丞。由冷官得一榜。來井地。擬籌留京費。人地生疏。殊感困難。曉帆獨力任之。歲餽數百金。曾深德之。及撫黔。以軍功歷保加道銜。三子輝山。玄功。外潛修淨業。雖家人無知者。及爲僧了明。道破。謂逝時只啜茶一杯而已。年七十。集昆弟子姪從容話別。飲茶訖。置杯而逝。其安詳如此。當生極樂無疑矣。六子紫瀾。吾師也。得寶臣先生之傳。造詣深邃。善言德。行。門弟子數千人。沾溉遐邇。得還丹者殊不乏人。孫曾數十人。其家風至今不替云。先生之將歸道山也。謂予及門弟子曰。大劫將臨。吾不忍見。爾等親遇之。各勉修持。度茲浩劫。此劫難旣廣且久。不惟四川。全中國在內。不惟中國。全世界俱不免云云。予時頗疑其言。不意先生上昇後。而辛亥革命事起。繼則歐洲大戰。今則日寇方張。內鬨不已。而日俄日美之戰。又將實現。至誠之道。可以前知。不其信歟。咸同間。牛雪嶠樹梅爲寧遠太守。清廉勤慎。政聲翕然。忽地震三日。全城房屋傾圮。

死人無算。府署亦毀多處。其子壓斃。公足踵亦受打擊。不良於行。意殊憤懣。爲文質問府城隍神。責其受萬民香煙。不加保護。全城之大。豈皆惡人。卽本身服官。自問無疚。而子竟死。已亦傷。豈真天道無憑。神鑑不爽耶。夜夢城隍延往。賓主列坐。告之曰。君以文字見責。理直氣壯。惜不識鬼神之道。故請君來一談。以釋疑謗。凡浩劫之成。皆衆人積孽所致。斷非偶然。此次震災。冥冥中經五十年之調查紀錄。凡不應罹禍者。均移往他處。若近造新殃者。又移之使來。卽臨時亦尙有出入。非漫不加察。而置人民於不顧也。公曰。然則城中竟無一善人。我及我子亦遭罪譴耶。神曰。尙有三家。力難遽徙。現皆無恙。一某街節婦。三世孀居。撫一小孫。一某醫生。生平不賣假藥。有延診者。無論夜深雨濤。卽時赴之。盡心療治。一賣油糴老母。并其幼孫。均未罹害。君歸查之。卽得不汝欺也。君之子前生業重。無可逃免。卽君亦在劫。以居官廉慎。故得從寬。只傷足踵。總之神天賞罰。慎之又慎。絕不偏私。旣無無妄之災。亦無倖免之理。勉作好官。當昇陳臬。公遜謝。並致歉意。寤後徧訪。果得節婦及醫生。均全家存在。不過卑小。爲兩側房屋傾蔽之。致不覺耳。惟賣油糴老母。幾經查覓。乃得之於橡桷交撐下。詢之。則平居業此。凡老弱殘疾者。錢不足。亦售與之。閒亦施予。不責一錢。當地震前一二日。忽購者驟增。供不敷求。遂偕其孫夜作以待售。及地動屋崩。祖孫二人

覆傾屋下三日。卽恃油糲充飢。壓力大故不能自出。今得見天日。非初念所及也。公大奇之。自是深信鬼神因果之理。益勉爲循良。後果遞昇至四川按察使云。

光緒初。吾榮張旭波宗禮。與先兄書年。肄業成都尊經書院。爲莫逆交。因訂姻誼焉。其弟旭坪。從李卓凡先生讀書榮梨山。年十五。忽爲女鬼所祟。投繯赴水。而不卽死。支離恍惚。如癡如醉。卓凡於隔室作疏。擬申佛前。鬼附旭坪體曰。爾師控訴我。我無懼也。崇如故。不得已送回所性溝住宅。一日薄暮。不知所往。內外覓不可得。惟聞其聲及闔戶。則旭坪赤足。以足大趾立門檻上。倚門笑曰。爾等呼叫。女子搖手戒勿應。聞母喚聲。失口應。女子無如我何也。一日又失蹤。遍尋久之。聞有聲自空樓出。梯而上。見旭坪以帶懸架上。一手挽之立。詰之曰。女子握予髮。由窗格中拖入。逼令繫頸。聞母喚聲。戀戀不忍。則女子倒退不敢近。相持甚久。設非母聲深入予心。則已無力拒之矣。其父亟函省。促旭波歸。歸時過予家。謂舍弟嗜慾開邪心致魔。歸當痛斥之。自無慮矣。不意歸後崇尤甚。審其音則女子。詰其故則前冤。與之和則峻拒。與之辯則鋒利無似。於是氣沮而術窮。承親命。焚疏竈神。乞解救。次日竈神附旭坪體。謂旭波言。女子姓某字某。爾弟前生業刑名。入陝西陳令幕。女嫁未期年。夫暴卒。訟於陳。訊久不決。陳商之刑席曰。得毋女子有外遇。故謀其夫乎。陳以爲然。嚴訊之。女子聲

色俱厲。抗辯不服。閱日覆訊。逼令招供。女子憤極。出袖刃刎於堂。是以今生索償命甚亟。然女性剛烈。不可勸。須得陳令來。庶幾轉圜耳。問陳在何處。曰任職丹桂宮。申文求之。當可來。越日陳至。仍附旭坪體。謂旭波曰。當日我失察。爾弟亦失言。幸我作官廉。女不敢致恨。而修怨於造意誤疑之人。其忿戾之氣不可遏。雖吾勸慰亦弗解。奈何。旭波及父母兄弟均泣求維護。凡可以議和者。除抵命外。無不唯命是聽。先後勸請凡十數次。女子曰。看陳公面。姑讓步許和。然三事當如議。一廢學。終身不應試。二誦金剛等經若干卷。三設予魂位。時申供養。旭波稟承親命。二三如議。首條另商。女子執不可。爭甚力。旭波問先代以學世吾家。應試尋常事。女子何以強持之。陳曰。科名祕密。本不當洩。爾弟應進士及第。故女子泥之。欲折除抵償耳。家人聞此。益不允輟學。商所以易之者。女子堅持前議。遂至決裂。旭波語未轉。而旭坪目定舌出。氣閉體直。其母悲號泣告曰。一切如議。從爾乞命可也。女子釋手。久乃平復。旭波稟商父母曰。要盟者不信。姑從權允之。俟彼轉生已。再應試爲妙。女子曰。爾等欺僞無信。冀他日敗盟乎。旭波憤極曰。吾弟雖誤疑。而聽訟在主官。一也。前生一人。今生又一人。不報於前生。而取償於今生。二也。不報於十五歲以前。而崇之於成童之日。三也。女子曰。讀書人不知幽明之故。因果之理。強詞爭辯。本不必答覆。姑告汝一二。以醒

世人可也。聽訟雖在主官。而刑幕實先造意。陰律誅心。故捨彼而取此。此其一。今生與前生。形體雖殊。靈魂則一。遲速之故。由我有宿業。不能自主。此其二。我請准索償以來。累年矣。因汝家祖德未湮。新業未熟。家神竈神戶神均不許入宅。只得緩待。今則餘福將盡。新殃益滋。故得近汝。此其三。旭波忿然曰。吾家率循先教。所謂新殃者。何所見而云然乎。女子曰。本不願詞費。然亦不妨指陳。姑言三事。以折服汝。何者爲三。一曰多殺生命。二曰污穢字紙。三曰褻瀆神明。旭波斷斷辯。且責事實。女子曰。聽之。爾家素少殺生。然十年來。親老多病。男女工人。往往夜出叉魚。久成習慣。春秋收穫。兩次田魚。烹煎尤不少。甚至變臭傾棄。罪坐家長。至今不悟。書房字紙。不時焚化。爲鼠拖齧。污損日甚。不堪。今試搜查竹摺頂篷內。一觀自知。毋庸強辯。新修經堂。不愼擇淨地。而建諸舊時牛圈之所。置經禮誦。不惟無益。轉滋罪戾。尙自謂無疚耶。旭波旋查確三事。皆不虛。乃謝指陳。申文懺悔。女子要求立約。須全家畫押焚與之。於是擾攘半年之冤累。始告結束。旭坪乃愈。旭波來予家。託爲放生。并印惜字篇。惜字靈徵。勸毀淫書徵信錄等書。以勸人。以上各情。皆予與先考妣及先兄等親聞之於旭波者。後數年。旭波卒。又數年。其弟旭初與予同補博士弟子員。未幾又卒。其家遂無在庠者。其父謂旭坪曰。書香將絕。盍溫課爲入試計乎。旭坪以渝盟爲疑。父曰。事

隔十年。當轉生矣。庶幾無慮。是年九月縣試。旭坪勉入城。寓桂林書院。赴禮房納卷。歸至城隍廟巷口。突見前女子怒目切齒曰。爾將應試耶。旭坪倒地昏迷。昇歸寓所。薑湯灌治。乃醒。次日歸去。自是遂絕意進取云。

按近日新學家動謂無鬼神。謂見鬼神皆由幻覺所致。又不信輪迴之說。且謂天生萬物。所以供人食。視生命爲不足惜。謂字紙爲不足重。以誦經爲虛文。以敬神爲迷信。觀於張旭坪事。當無置辯之餘地。予故不憚詞費而詳述之。冀世人知所勸戒云。

峨眉山錫瓦殿僧了明。微有前知。所言多奇中。自言熟一掌金。〔查續藏經中有僧一行之一掌金法頗詳。然了明術不止此。蓋借是書爲託詞耳。〕每問人生年月日。輪指計之。言過去事。休咎如目覩。士大夫爭譽之。嘗三客予家。語殊驗。〔謂先慈進六十歲有厄。後果然。謂舍弟叔權英當作觀察。時方二十歲。後二十餘年。署蘭山道。〕藍福齋任三費局事。來晤。請教。了明曰。君太夫人當跌足。福齋曰。信然。數日前曾失足跌堂上矣。曰。當再跌。歸局得家函。言母又跌。衆驚異之。嘗客三多岩顏桂馨堂。李某家被回祿。重建以輒。了明曰。慎之。當再燒。李不悅。數月工甫竣。復燬於火。又建之。多隔以牆。堅固倍於昔。適了明又至。李力言規畫之密。了明笑曰。慎之。當再燒。李

氣沮歎曰。師不幸而言中。盍緘其口乎。了明曰。君爲數所囿。我言其當然耳。不言又安可免乎。已而果然。其決人生死無不驗。顏輝山靜坐有得。而密修淨土。了明一見笑曰。老人佛念得好。去時只啜茶一杯。含笑逝矣。已而果如所言。崔玉山者。紫瀾先生之高足弟子。年七十。習玄頗深造。雲和【先生長子】語了明。試相之。了明言崔君功甚佳。惜月餘當升天矣。雲和以語崔。崔曰。我寒士。幸而聞道。時行則行耳。雲和白父。紫師曰。學道人本不畏死。然吾輩講道數十年。而爲了明所斷定。不克轉移。毋乃爲人笑乎。召崔至。詰之。崔言如前。師曰。固也。但聽之。了明將謂秦無人耳。爾發心求壽。吾爲爾驗之。於是設壇申文。誦經禮懺。紫師躬親拈香祝之。法筵五日畢。逾月崔無恙。明年春。了明又至。雲和請崔至。甫入門。問師識此人否。了明曰。崔公猶在耶。閉目須臾曰。六老太爺【謂紫師】神通廣大。我不敢饒舌矣。相視而笑。於此見道之能挽回氣數矣。史載忠國師之呵大耳三藏。自詡他心通。爲野狐精。古今人何遠不相及耶。然佛門高僧。去住自由。其境界又高矣。

予外舅蕭公西屏。蕃世居仁壽迴龍場。族大人衆。公先世累代好施。公尤慷慨不稍吝。里黨戚族來告貸。輒隨緣施予之。光緒甲申乙酉。連歲大旱。罄所儲穀賑飢民。數十里外來者。麇集門外。不足則借楚廟存穀以繼之。族人歉收者。亦分給以穀。家中